

DISSERTATIO INAUGVRALIS MEDICA
DE
INFLVXV FODINAE
BVLACENSIS WIRTEMBERGICAE
IN
ACIDVLAS proximas DEINACENSES.

QVAM
RECTORE VNIVERSITATIS MAGNIFICENTISSIMO,
SERENISSIMO PRINCIPE AC DOMINO,
DOMINO
IO. CAROLO LVDOVICO,
COMITE PALATINO RHENI,
VTRIVSQUE BAVARIAE DVCE rel. rel.
PRAESIDE
VIRO EXCELLENTISSIMO ATQVE EXPERIENTISSIMO
DOMINO

PHILIPPO FRIDERICO GMELIN,
BOTAN. ET CHEM. PROF. PVBL. ORD. SOCIET. REG.
LONDIN. ET GOETTING. SODALI,
SVMMOS IN MEDICINA DOCTORIS HONORES CAPTVRVS,
D. XXIII. OCTOBR. MDCCLVIII.
HORIS LOCOQVE CONSVETIS
PVBLICE VENTILABIT
AVTOR ET RESPONDENS

FRANCISC. CHRISTIAN. LVDOV. FROMMANN, *Gœpping.*

TYBINGAE, LITTERIS ERHARDIANIS.

*Medium sunt aquæ minerales, quo Natura metallica
cum animantium corpore conciliat!*

**ROCHAS de vera anatomia spa-
gyrica aquarum mineralium..**



§. I.



E x universo scientiarum adparatu, quæ *Tractationis occasio & utilitas.*
 studii Medici amplitudo continetur, Historiam naturalem, atque Chemiam in
 deliciis habere cœpi, inde ab illo tem-
 pore, quo ad artem salutarem animum
 adplicui. Quin imo, vix decimum
 ætatis annum absolveram, cum B. D. GMELIN, co-
 gnatus meus, vir & mihi & bonis omnibus longe de-
 sideratissimus, primos illius studii igniculos in me ex-
 citaret, qui accedente eiusdem non minus quam Fra-
 tris prorsus Germani, *Excellentissimi* PRAESIDIS
 fidelissima institutione eo mentem ardore inflamma-
 runt, ut iam de *THEMATE Dissertationis inauguralis*
 cogitanti ultro sese obtulerit hoc ipsum, quod in ru-
 bro significauimus, argumentum, historiæ natura-
 lis patriæ non omnino contemnendam partem attingens.
 Neque tamen eiusmodi est argumentum, quod
 nullas undique admittere possit observationes Medica-
 cas, quum omnes norint, ex aquis mineralibus sca-
 turire nobiliores vires, salutis corporis humani siue
 conseruandæ, siue restaurandæ diuinitus destinatas;

nec desint copiosa, eademque egregia experimenta, ad oculum comprobantia, grauiissimos morbos sola aquarum mineralium ope fuisse pulsos. Enimuero ut hasce vires, quarum fundamenta delitescunt in peregrinis aquarum contentis, aqua suffultis, præscire, easdemque veluti prælagire queamus, haud parum sane interest, si intelligamus, qualia sint ista contenta, & quam ad ista aquæ adeo non sint adia-phoræ, ut sua potius, qua in corpus humanum influunt efficacia, penitus sequantur horum contentorum differentiam. Qualis autem, & quanta hæc sit, id quidem historiæ naturalis & chemicarum inuestigationum beneficio determinari debere, nemo in arte peritus diffitebitur. Liceat ergo mihi, profectum in diuersis Medicinæ partibus publicam hec rationem reddituro, eas ex historia naturali observationes decerpere, quæ medicis, si quidem in illas excurrere placuerit, spatiosum satis campum aperient.

§. II.

*Tractionis
ratio propius
determinata.*

Subiungam vero aliam, eamque primariam instituti mei rationem. Extiterunt inter Medicos, quos antiquior ætas tulit, qui aquas minerales Deinacenses, ob viciniam fodinae metallicæ Bulacensis, multum veneris in suo sinu fouentis, eiusdem metalli participes esse suspicati, iis ex hoc ipso principio non admodum laudabilem suspenderunt hederam, sic D. LEPORINVS, sententiam celebris suo ævo D. TABERNAEMONTANI secutus, salutare istas aquas imaginarii huius vitii damnauit, in succincta earum *Descriptione*, Heilbronnæ A. 1650. typis exscripta, ubi audacius iusto pronunciat: continere aquas Deinacenses cuprum, vitriolum, argenti mineram, & lapidem lazuli, flori lunæ similes, eaque principia repetere e vicina fodina metallica Bulacensi;

fi; e mixtura vero horum mineralium occulta nasci grate mordacem saporem, & magnam efficaciam harum aquarum. Huic veterum sententiæ multi etiam recentiores subscripserunt Medici, ægrotis varii generis acidulas Deinacenses ex præiudicata sua opinione dissuadentes. Itaque non nullum operæ pretium esse existimo, si in præsentī hac disquisitione academica fundamenta illius suspensionis pro virium mensura explorem, spei ex aquis illis salutaribus hauriendæ meum etiam calculum, quantumvis tenuem, adiiciam, omnemque noxæ metum scrupulositate utentium indignum esse ostendam. Huic autem scopo velificaturus omnes, quæ rei lucem affundere possunt, circumstantias congeffi, relationes de fodina Bulacensi typis impressas non sollicitè tantum per-volutaui, sed & haud ita pridem ad inferna hæc ipsemet descendi, & quæ ad solidam causæ decisionem aliquod conferre possunt pondus, attentius spectavi. Primum igitur hoc agam, ut relationes & observationes, e quibus merita causæ æstimari debent, paucissimis nostro obtutui sistam, tum vero, quodnam ex istis principiis de aquarum Deinacensium innocentia & salubritate ferendum sit iudicium, modestissime indicabo.

§. III.

Authenticam fodinæ Bulacensis metallicæ historiam pandunt *Relations illæ hebdomadariæ Physico-Oeconomicae*, Stuttgartiæ sub tit. *Physicalisch-Oeconomische Wochenschrift* 2c. prodeuntes, & quidem *Vol. II.*, quod superiore demum anno comparuit, ubi *pag. 684. sqq.* titulo generali exhibetur: *Beschreibung einiger Württembergischer Bergwerke* 2c. Redigamus in compendium, quæ ibi prolixius enarrantur. Fodina hæc iamiam sæculo XIII. floruisse vi-

Historia naturalis fodinæ metallicæ Bulacensis.

detur; & prostant vestigia, e quibus colligas, priscis temporibus strenue in illa fuisse laboratum. Quæ, & qualis ab A. 1326 usque ad A. 1535 illius cultura fuerit, explore non constat. Tum vero VLRICVS, *Dux Wirtembergiæ*, suis illam auspiciis indignam haud iudicauit, adeo, vt sub hoc regimine A. 1539 fodina, quæ a D. Margaretha nomen tulit, exculta fuerit. De die 7 mensis Augusti A. 1517. prostant argumenta, e quibus colligitur, isto tempore omnino viguisse fodinæ nostræ culturam. Post fata CHRISTOPHORI, *gloriosissimi Ducis*, usque ad A. 1597 neglecta fere fuit; at post illius ætatis iniurias pristino vigori restituta. FRIDERICVS *Dux*, in eadem augenda nec operæ pepercit, nec sumptibus. A. 1610 denuo culta fuit, sed absque notabili fructu. Illo tempore testabantur viri, canitie sua conspicui, olim tam elegantem ibi reperi- tum esse colorem cœruleum, qui suo pretio solus impensas, in fodinam factas, exæquare potuerit. Mineræ cupri griseæ Bulacenses continebant XVI vsque ad XVIII libr. cupri, e cuius centenario vna marca vsque ad uncias x argenti fuerit eliquata. A. 1623 diligentiori examine instituto repertum fuit, uncias xxxij. minerarum cœrulearum, viridiumque tostiarum dare cimoliæ (germ. *Schlich*) unciam vnam & drachmam unam, cuius cimoliæ centenarius unciam vnam semis argenti, cupri autem XXV libr. contineat. Patet ex hæcenus dictis, fodinam Bulacensem mox cultam fuisse, mox incultam iacuisse. Vt vero de illius indole vltius constet, notandum: duas ibidem species meatuum metallicorum, *Salden* vulgo dictorum, inueniri, eosque secundum directionem veri tractus metallici (*Erzgang*) mox ab initio cuniculi versus septentrionem iacere; quemadmodum verus tractus metallicus, pluribus iam annis abhinc erutus,

erutus, pagum Liebelsbergam attingit, ad cuius radices situm est Deinacum. Dicuntur vulgo isti meatus Grubenhalden, non nisi ex duris & asperis lapidibus conflati rupibusque, quos olim metallico-
 læ paulo ante fodinas metallicas a saxis mineralibus separarunt. In petrosis hisce recessibus vestigia nonnunquam emicant colorum efflorescentium, quin & minerarum ipsarum; quæ autem minerae a venis haud diuitibus prouenerunt. Iuxta dictam vero fodinam metallicam per vniuersum tractum, qui oppidum Bulacense ambit, in amplissimo campo maximi acerui e cryptis, quæ dicuntur Scheidehalden, reperiuntur, qui lapidibus cœruleis, flauis, viridibusque pictis coloribus referti sunt, quæ veræ etiam interdum immixtæ videntur minerae. Veteres mineras liquarunt Deinaci, vbi caupona nunc exstructa conspicitur, sub qua etiam in profunditate XIII pedum indicia tusarum minerarum atque scoriarum deteguntur. Ex mineris his, ob lapides duros atque asperos, parum producit metalli. Inciderunt etiam ad limen veri tractus metallici, vel ut metallico-
 læ loquuntur vor Ort, in pulchram atque egregiam venam quarzofam atque orystallinam copiosam, germ. einen mächtig streichenden Quarz, und Crystallengang, quæ cupri argentique minera diues est; in quibus mineris habetur cœruleum natium montanum, renum forma repræsentatum, Nierenweis, uti loquuntur, idemque optimæ notæ; & si metallicis fides habenda est, multa centenariorum millia huius minerae effodere liceret. E minerarum harum centenario, in metallifodinis recepto, experientia teste, XV - XXX, vsque ad LIV libræ cupri, argenti vero vnciæ iij fuerunt eliquatæ. Quod ad situm fodinarum harum metallicarum attinet, meatus quoad directionem suam versus excelsum collem
 ex

excurrunt, vt cum indicato cuniculo, vbi colorum materia effoditur, germ. Garbstollen, vsque ad inceptum Himmelfarts Schacht, profunditas circiter DC. orgyiarum emergat. Exinde non tantum aquæ cuniculares, germ. Stollen-Wasser, sed etiam omnes aquæ, a superiore montis regione prouenientes, educi poterunt.

§. IV.

Continuata fodina, saxorumque illius historia.

Reperiuntur etiam fodinæ quædam metallicæ circa vicum Martismos am Eichwald, quæ vnica tantum distant hora ab vrbe Bulaco, vbi veteres nobiles quasdam argenti cuprique venas quæsiuerunt. In meatibus huius regionis reperitur quarzum atque spatium, in quibus veteres sine dubio diuites cupri & argenti mineras inuenerunt. Haud ita procul ab vrbe Neuenbürga in omnibus veteribus meatibus pulcherrimi hæmatitæ sese inuestigantibus offerunt atque schisti, germ. Glasföppe. Offendimus etiam circa pagum Oberhusam veterem quendam tractum metallicum minorem, germ. Schächtlein, in cuius recessibus pulchræ ferri mineræ globulosæ, quæ germanis Bohnerze audiunt, colligi possunt. A. 1726 fusor quidam ex VIII cent. mineræ non plus, quam LXV libr. lapidis fudit, qui vnciam vnam adhuc argenti, & XLVI libr. cupri continebat. Plenior eliquatio dedit vnciam vnam & 3vj argenti, cupro tum addebat antea acquisiti lapidis XCIV libr. qui e IIIß. cent. mineræ erat eliquatus, ex vnciis iv argenti, & LXV libr. cupri, vt tandem ex tota hac liquatione acciperet CXX libr. cupri puri, germ. Garfsupfer, cuius cupri centenarius continebat vncias vj argenti. A. 1747 noua conuenit societas metallica, vernacula Gewerkschaft, quæ cuniculi huius, titulo Seegen Gottes donati, culturam ab angaria Luc. vsque ad angariam Re-

Reminisc. Anni 1749 suscepit; misit hæc societas XVII cent. cimoliæ atque minerarum electarum, germ. Scheiderke, in officinam ærariam Christophsthalensem, quarum minerarum & cimoliæ centenarius vnciam vnam argenti, & XII libr. cupri impuri atque fragilis, germ. speißigt Kupfer continebat. Ab initio A. 1757 fodina hæc metallica Bulacensis solis sumtibus *Severisfini nostri* ductis colitur. Contractæ huic relationi ea adhuc addo, quæ mihi ex diario fratris Excellentissimi Præsidis, peritissimi inter nos Chemici atque Metallurgi, qui ante XXXVI circiter annos mineras aliquot Bulacenses examini docimastico exacto subiecit, suggesta sunt: optimæ mineræ, germ. ganz derbe Erzte (experimento cum minori massa facto) ostenderunt XXIV libr. cupri. Mediocres XVIII libr. & vncias ij. Vilissimæ XII - X vsque ad VII libr. In æquali proportionem etiam aderat argentum. Optimarum minerarum cent. continebat dimidiam marcā argenti; Mediocrium cent vncias ij; Vilissimarum denique cent. vnciam vnam, vnciam semis & 3ij, aut vnicam tantum semunciam. Tum temporis cuprum hoc valde erat Bismuthicum, & regulus plerumque magis nigrum quam cupreum habuit colorem; bismuthum vero facile consumebatur in tegula furni docimastici, puro remanente cupro.

§. V.

Hæc sunt, quæ aliunde habemus de fodina hac metallica Bulacensi. Liceat iam ea subiungere, quæ ipsemet vel observavi, vel quærendo ex metallariis Bulacensibus hausi, & quæ ad scopum meum propius accedere iudico. Momenta investigationum mearum sequentibus complector numeris. Quod I. ad situm attinet, ipsa me inspectio docuit, fodinam Bulacensem quoad maximam partem sitam esse versus meridiem, ita tamen, ut ex aliqua parte versus orientem vergat,

Ulterior fodina, illiusque thesauri historia, per autopsiam, propriasque observationes congesta.

aut, ut metallarii loquuntur: zwischen 10 und 11 Uhr.
 II. Quoad situm illius ratione aquarum mineralium
 Deinacensium, & quoad relationem ad easdem intuitu
 altitudinis & profunditatis, inueni: ostium fodinæ
 (die Einfart) ab istis aquis integra hora distare; de-
 meacula autem eius ad distantiam horæ dimidiæ ple-
 nioris versus aquas modo dictas porrigi. Fodina mul-
 to profundior habet situm, ac aquæ hæ minerales.
 Nemo de his dubitauerit, qui vel leuiter suis oculis
 utrumque situm examinauerit. Ostium fodinæ in pla-
 nitie quadam aperitur. Fodinæ profunditas ab hoc
 ostio est LXX orgyiarum: vallis, per quam exinde ver-
 sus fluuium Nagoldam satis vicinum descendimus, vix
 tantam habet, quantam fodina profunditatem. Ita-
 que eadem est & vallis & fodinæ profunditas: at ve-
 ro, vt ab hisce locis ad aquas Deinacenses peruenia-
 mus, per integræ horæ dimidiæ spatium in altum as-
 cendere oportet. Hinc III. non difficili negotio de-
 cidi poterit quæstio, num probabile sit, aquas illas
 quasdam fodinæ mineras attingere, aut easdem per-
 meare. Fateor, id omni prorsus destitui verisimilitu-
 dine. Omnia enim indicia illa externa, quæ alias
 fodinam metallicam prodere solent, in illo tractu,
 qui Deinacum versus tendit, euanescent. Lapides
 ibi reperti, sunt arenosi, nec amplius, vt Bulacum
 versus, viridibus, cœruleis, atque fuscis picti appa-
 rent coloribus. Porro, versus Deinacum ante mul-
 tos iamiam annos sæpius terra fuit transfossa, sed quia
 nullas ibi inuenerunt mineras, antra hæc terra iterum
 sunt obruta. Accedit & illud, quod fodina hæc ad
 meridiem vergat, aquæ vero minerales ab occidente
 profluant. Si IV. dimensionis ratio haberi debeat,
 edoctus sum, profunditatem fodinæ esse LXX orgyia-
 rum, longitudinem DCC & latitudinem XXX; casæ
 illi, qua mineræ contunduntur (Pochwerk) adiacet
 cuni-

cuniculus, cui incisus est annus 1596, quem metalli-
colæ detectæ huius fodinæ memorialem venditant.

§. VI.

V. Quantum cupri ex lapidibus mineralibus opti-
mæ notæ fuerit eliquatum, de eo quidem metallariis
Bulacensibus non constat. Acquiescimus igitur in
iis, quæ supra iam fuerunt observata. Præterea ve-
ro VI. mineræ istæ cupri argentique simul participes
sunt; interdum quoque, quamvis rarissime, argentum
fossile seu natium exhibent. Quum igitur VII. uti
ex antecedentibus patet, hæc fodina metallica inde
a Secul. XIII mox culta, mox derelicta fuerit, nunc qui-
dem ab 1747 metallarii denuo suos in illa labores con-
tinuare instituerunt. VIII. Species lapidum, quæ in
ea inveniuntur, sequentes sunt:

*Minerarum,
saxorum, alio-
rumque huius
fodinæ memo-
rabilium de-
scriptio.*

1) Cuprum mineralisatum, minera, fractura ni-
tente, fragili. Cuprum Lazureum, vernacula Lazur.
Vid. Waller. mineralog. p. 361. Spec. 271.

2) Cuprum natium foliaceum, germ. Blättrich-
tes gediegenes Kupfer. Vid. Waller. mineralog. p. 356.

3) Cuprum mineralisatum, minera, fractura pa-
rum nitente, cinerea, vel nigra, dura. Metallum
cupri canum, germ. grau Kupfererz. Vid. Waller. mi-
neralog. pag. 363. Spec. 273.

4) Cuprum, arsenico, ferro & argento minerali-
satum, minera albescente. Minera cupri alba, germ.
weiß Erz. Vid. Waller. mineralog. p. 364. Spec. 275.

5) Cuprum, sulphure & ferro mineralisatum, mi-
nera, colore aureo vel variegato, nitente. Minera
cupri flava. Chalcopyrites. Pyrites flavus, germ. gelb
Kupfererz. Vid. Waller. mineralog. p. 365. Spec. 276.

6) Minera cupri viridescens, colore fortius flavo.
Vid. Waller. mineralog. p. 367. Spec. 278. var. 2.

7) Guhr album. Lac lunæ Bethlehemiticum, Hen-
ckel,

ckel. Vulgo Erdgalle. Vid. Waller. mineralog. p. 20. spec. 12. var. 1.

8) Crystallus montana, apice vno. Crystallus anisogona. Velsch. germ. Bergcrystall mit einer Spitze. Vid. Waller. mineralog. p. 144. spec. 109. var. 1.

9) Spatum lamellosum molle. Spatum lamellare. germ. Schiefer. Spath. Vid. Waller. mineralog. p. 79. spec. 51.

10) Mica squamosa lutea. germ. Kupfer. Glimmer. Vid. Waller. mineralog. p. 175. spec. 127. var. 2.

11) Marga lapidifica dendritica. Dendrites margaraceus. Vid. Waller. mineral. p. 35. spec. 31. var. 3.

Lapides hos, quorum singulorum ad manus habeo exempla, & in fodina ipsa, & in regione circa eam hinc inde dispersos colligere possumus. Isti vero, qui elegantissimum habent colorem cœruleum, præcipue inveniuntur versus orientem.

§. VII.

*Determinatæ
reliquæ condi-
tiones fodinæ
huius, & eius
proximæ vici-
niæ.*

Si IX. quærat, quomodo regio & terra circa fodinam hanc metallicam sit comparata? Quales species terrarum atque lapidum ibi reperiantur? An multæ ibi fluant aquæ? Respondeo: Regio multis abietibus pinisque superbit, multi magnique circa Bulacum reperiuntur lapides arenosi atque calcarii, qui, aut viridibus, aut cœruleis, aut fuscis obducti conspiciuntur coloribus. Terra ad illam speciem, quam Waller. p. 25. argillam coloratam rubram dicit, proxime accedit. Aquæ in valle quidem, in montibus autem paucissimæ reperiuntur. Numerus illorum fontium, ubi aqua per canales fluit, valde exiguus est, & hi etiam post mediocrem siccitatem mox exarescunt, sub quo tempore incolæ, aquas ex puteis, qui eo frequentiores sunt, haurire coguntur. X. De fodina ipsa tenendum, illam intus valde madidam esse, & ventis

ventis quandoque adeo vehementibus perflari, ut metallariorum faces sæpe extinguantur. Aquæ tam large profluunt e cuniculo, ut hæ fere solæ rotam directam, quindecim pedum altam, in gyrum agant. XI. Et illud obseruandum, aquas Bulacenses melioris notæ esse, & ab incolis non minus quam aduenis absque vilo molestiæ inde redundantis sensu hauriri, exceptis illis, quæ ex cuniculo profluunt, quæ sapore adstringentes, nauseosæ metallariis, eas bibentibus, vomitus cient. In reliquis aquis nil desideres, molestus tantum est sapor quarundam putredinosus; id vero de illis duntaxat aquis valet, quæ puteis incarceratæ, per stagnationem hunc saporem contrahunt.

§. VIII.

Exhibui hæcenus, uti quidem arbitror, sufficientia data, ex quibus quæstio nostra solidius poterit diiudicari. Superest, ut inuestigem: an nihil ex origine fontium aquarum Deinacensium, & earum, quæ adficiuntur conditionum, tum obiter, secundum qualitates sensibiles spectatarum, tum etiam per acutissima experimenta exploratarum, conici possit, quod momentum ferre possit ad decisionem causæ. De situ, quo aquæ ad fodinam referuntur, iam diximus §. IV. addamus reliqua, huc facientia, ex D. PLANERI, Medici Caluensis, libello A. 1740. edito, qui inscribitur: ausführlicher Bericht von dem Deinacher Gauerbrunnen &c. ubi sequentia leguntur: Ex vetustissimis & præcipuis Ducatus Wirtembergici aquis mineralibus hæ sunt aquæ Deinacenses, prout in Crusiannalibus Sueuicis passim id conspiciere possumus; in angustissima hæ aquæ minerales Deinacenses sitæ sunt valle, ad riuum æquale nomen habentem, & distantia horæ exiguæ in fluuium Nagoldam fluentem. Quatuor adsunt cisternæ, in quibus scaturigines aquarum

*Historia brevis
aquarum Deinacensium, &
examinis illarum per reagentia.*

rum reperiuntur, tres earum in vsum bibentium, vnus in vsum adest balneo insidentium. Omnes hæ clausæ cisternæ ex oblongo quadratam habent figuram, longitudo illarum est 4 ped. latitudo $2 \frac{1}{4}$ ped., profunditas vero $3 \frac{1}{2}$ ped. In cisternis his aquæ minerales e profundo cum bullis ascendunt, in quavis cisterna 5. 6. aut plures etiam sub repurgatione cisternarum, germ. bey dem Streiffen des Sauerbronnens conspiciuntur scaturigines. Repurgatio hæc quouis anno bis, vere nempe & autumno suscipitur, vbi exhausto fonte, lapides e cisterna eximuntur, qui deinde a limo, in quo autem nullum vestigium aut mineræ, aut metalli, aut salis reperitur, purgantur, atque hoc modo purgati, rursus cisternæ redduntur. Vetustissima, & antiquissimis iam celebrata temporibus cisterna, est media, & post inuentionem reliquarum nunc pro vilissima habetur. Hæ sunt aquæ istæ, quarum ab vfu tam multorum hominum salus amissa iterum fuit restituta, sapore neque nauseosæ, neque adstringentes, neque vllos etiam procreantes vomitus. Hac de re qui dubitat, egregia illa experimenta. D. GERLACHI, Physici Caluensis, libello D. PLANNERI supra allegato annexa, legat, & inueniet, molestissimos ventriculi, pectorisque, morbos, hæmoptysin, phtisin, varias asthmatum species, colicas &c. aquis his mineralibus Deinacensibus esse curatas. Porro in eodem libello p. 14 dicitur quidem: quod in cisterna balneis destinata, atque afferibus tantum tecta & circumdata, exhausta, in angulo versus ædes Principis scaturigo reperiatur, quoad gustum cum aquis Egranis quam maxime conueniens, quemadmodum etiam pari modo ante aliquot annos aquæ in alio loco Swalbacensi similes fuerunt obseruatæ. At hæc omnia nondum probant, aquas Deinacenses vel vnicum cupri granulum continere; cum

secun-

secundum relationes Celeberr. FRIDERICI HOFFMANNI in *Opusc. suis Phys. Med. Tom. II. p. 168. 169. 170.* Egranæ aquæ nil cupri contineant, idemque de Swalbacensibus pariter notum sit. Quibus hæc non sufficiunt, eos ablegabo ad B. D. GMELINI *Diss. inaug., qua dedit: celebrium Wirtembergiæ nostræ acidularum Deinacens. spiritusque vitrioli volatilis examen per reagentia. A. 1727.* ubi post hoc ipsum examen exactissime institutum §. 120. ita iudicium suum effert: Ex hisce iam constat, ingredientia acidularum Deinacensium esse:

- 1) Sal acidum purum, volatile æque ac fixum.
- 2) Sal alkali fixum & volatile.
- 3) Sulphuris subtilissimam substantiam, siue Gas sulphuris.
- 4) Ferrum embryonatum volatile.
- 5) Terram quandam subtilissimam, seu virgineam.

Nullum heic vestigium cupri!

§. IX.

Collatis hisce omnibus, quæ per observationes innotescunt, iam pronum fuerit, statuere: AQVAS MINERALES DEINACENSES NVLLIVS CVPRI PARTICIPES ESSE, SALTIM E FODINA METALLICA BVLACENSI, EIVSQVE MINERIS, NIHIL HVIVS MATERIAE REPETERE. Observationes tum ex aliorum relationibus, tum ex mea inuestigatione desumptæ totidem huius thesEOS existunt argumenta. Totus fodinæ metallicæ situs, cum regione, ubi aquæ minerales Deinacenses oriuntur, comparatus, thesi contrariæ repugnat. Omnes lapides, qui Deinacum versus reperiuntur, aliam quasi induerunt naturam, & nil quidquam amplius metallici ostendunt. Fodina metallica, in qua mineræ hæ

Decisio palmaria questionis in negatiuam.

hæ reperiuntur, multo profundiorum habet situm, ac fontes aquarum mineralium Deinacensium; nescio, cuius machinæ beneficio aquæ istæ, si vel maxime fodinam permearent, sursum propelli debeant? Gustatæ hæ aquæ neque nauseosæ dici possunt, neque adstringentes, neque vtilis etiam cient vomitus, quem tamen alias effectum omnes aquæ, vel minimum cupri continentes, præstant; quemadmodum effectus huius luculentissimum specimen præbent aquæ, de cuniculo fodinæ metallicæ Bulacensis promanantes. Sunt insuper neque ventriculo, neque pectori inimicæ, id quod luculentissime comprobant observationes D. GERLACHII; imo hæ corporis nostri partes non modo lubentes admittunt aquas Deinacenses, sed & ex istis in variis morbis, quos alias mitiora etiam ex cupro parata medicamenta exasperare solent, insigne leuamentum percipiunt. Denique optima reagentia chæmica, teste *Diff. cit.* aquis hisce applicata, ne vnicum quidem ostendunt cupri vestigium; ut taceam, omnes etiam aquas circa fodinam metallicam ipsam, & in vrbe Bulaco sine molestia bibi posse.

§. X.

*Dubia quædam
contra decisio-
nem primam
diluuntur.*

Audiamus vero & alteram partem, quæ non sine omni specie nobis obuertet: Aquas Deinacenses admodum vicinas esse fodinæ Bulacensi, quæ cuprum alit; experientia nos moneri, in hisce rerum circumstantiis huiusmodi aquis mineralibus cæco veluti impetu fidem non posse haberi, cum vicina plerumque sua sibi vitia communicent; quin fidem, reagentibus chæmicis vulgo tribui solitam, non omni exceptione maiorem esse. Sed respondemus ad *primum*, omnino nos cautos esse debere ac circumspectos, priusquam aquas minerales a sus-
spicione

spicione metalli, cuius plures mineræ in vicinia habentur, liberemus. Obseruauimus enim nosmet ipsi, largam satis copiam minerarum cupri in vicinia aquarum Deinacensium haberi. At in fumum abicit omnis iste metus, quem nobis incutere volunt, si vniuersum fodinæ situm cum situ aquarum, si illius profunditatem, cum harum altitudine comparamus, memores quoque, per notabilem tractum prope versusque Deinacum, nullum istarum cupri minerarum vestigium superesse, vt adeo cum fiducia concludi posse videatur, aquas minerales in vicinia huiusmodi minerarum omnis tamen nexus cum ipsis expertes esse posse. Taceo reliquas rationes supra prolatas. Experientia quoque edocemur alibi, quod terræ strata atque contenta in parua sæpius distantia sibi valde dissimilia sint, quodque minime gentium, sine præmissa exactissima disquisitione hoc illudque paruum stratum terræ ad alia strata, in vicinia sita, possimus referre. Quod ad *secundum* attinet dubium, ex vna parte non negandum est, cautius & exactius, tum in reagentibus, tum in reliquo scrutinio aquarum mineralium versandum esse; si quidem solidius, vel verisimile duntaxat iudicium ferri debeat. Largior & illud, quod experimenta satis demonstrant, in eiusmodi aquis mixturam esse posse, quæ omnem reagentium efficaciam eludat, ut adeo de contentis illarum decidi nil queat. At vero, cum neque de cognitis reagentibus, examini aquarum mineralium Deinacensium applicatis, neque aquis ipsis tale quid metuendum sit, & præterea omnes reliquæ circumstantiæ satis euidenter indicent, nullum cuprum aquas has minerales Deinacenses continere, hoc etiam argumentum, a reagentibus petatum, firmo talo inniti existimauerim.

§. XI.

*Confirmatur
decisio penulti-
mi paragraphi.*

Nullus ergo dubito, aquas Deinacenses ab omni cum cupro commercii vitio, & quoscunque illas sitientes a vano noxiorum effectuum, ex isto saltem principio resultantium metu absolvere, firmiter persuasus, nobilissimum istum fontem sine vlla noxa in morbis pectoris, vteri, neruorumque, ventriculi, & intestinorum, reliquorumque viscerum labe &c. a prudenti Medico non ordinari modo, sed etiam ab ægris cum spe salutaris successus hauriri posse, id quod, si non demonstrandum, certe subductis omnibus rationibus, quæ in specialissimo hoc argumento haberi, & ab homine mearum virium expectari poterant, ostendendum erat.

T A N T V M !

* * * * *

PRAESTANTISSIMO
DOMINO AVCTORI
DISSERTATIONIS, EIVSDEM
P R A E S E S.

*L*egi nuper elegantem Poëtæ locum, qui THOMAE BURNETTO, Sacrae Theoriæ Telluris Auctori cecinit, ita vero ibi Poëta:

*Quis tam valenti pectore ferreus
Vt non tremiscens & timido pede
Incedat, orbis dum dolosi
Detegis instabiles ruinas?*

Ego

Ego vero, cum paucos ante dies tristissimum audiui de obitu B. Domini Parentis Tui nuntium, Tuis tanto luctu interstrepentem honoribus, quos meditaris, academicis summis, cogitavi: quis tam valenti pectore ferreus non tremiscat inde filius & amicus? Norunt sane B. huius Parentis Tui merita insignia omnes, norunt autem imprimis etiam eminentem illam animi nobilitatem, qua se liberis, amicis, Bonisque omnibus non minus distinguebat ac commendabat. Huic maximæ fuit curæ Tua salus, vigil diu noctuque huius meditatio, recentissimis confirmata consiliis, Te petierat eo, quo Tuum belli strepitus vocauere fidissimum custodem, sed aliter Summo visum fuit rerum humanarum Arbitro, qui tutum voluit Parentem, digno ante Filio quam prospiceret.

Neque ideo spem felicitatis abiice omnem, non dormiet vigil ille Tui hætenus custodis Pater, cuius Te Divinæ providentiæ toties repetitis precibus, curisque ille tradidit, in qua omnem ille suam fiduciam collocavit, lætusque omni sub humanarum miseriæ tumultu placide recubuit! Emensus nunc es Tuorum studiorum stadium feliciter, & e voto B. Patris, coronabat finis opus, id quod Tua nobis abunde demonstrabant examina, nouo argumento firmavit hæc Tua dissertatio, proprio concinnata marte, a me quidem nihil accipiens. Ne igitur dubita, quin Te maneat Paterna benedictio, secundam fixura Tibi fortunam, sedemque determinatura, quæ haustam Tibi theoriam medicam ad praxin etiam applicandi auream faciat copiam! imbibisti sane doctrinas omnes, ad Medicum pertinentes, & avidus quidem eas absorpsisti, sedulus enim in collegiis Medicis & auditor fuisti,

fuiſti, & ſpectator, quare humanorum certe ſubſidio-
rum nihil Tibi deeſt, quæ bonum forment Medicum
etiam practicum; quodſi vero nunc addes ea, quæ or-
nant, imo vero, quæ non ornant modo, ſed & vere
certoque felicem reddunt Medicum, & quorum ſumma
redit ad pietatem non fucatam, infallibili efficacia, nulli
æquiparanda, medicos mores emollientem, experieris
breui, quanta ſit Diuinæ benedictionis potentia, quam
poſſit ea uberrime reſarcire iacturam curarum huma-
narum, quibus nihil prius, antiquius nihil eſſe credeba-
mus, & e ſuis inexhaustis diuitiis, e quibus etiam ſolis
noſtri Patres viuunt, filium Parente orbem fideliffimo
plena ſolari ſalute, fauiffimoque rerum omnium ſuc-
ceſſu! Arripe igitur hanc ſalutis, & ſpei anchoram,
eoque amplexu Tuæ Te fortunæ fac fabrum, quam cer-
to certius hiſce ſub conditionibus inuenies, id quod &
pro ea, quæ inter nos intercedit amicitia, & propter
illam Tuam egregiam patriam ingenuitatem pleno Tibi
apprecor animo! Scripſi e muſæo meo Idibus Octobris
A. R. S. MDCCLVIII.

